

出現於世後復有佛名曰蓮華出現於世後  
復有佛名毗婆尸出現於世後復有佛名曰  
尸棄出現於世後復有佛名毗舍浮出現於  
世後復有佛名拘留孫出現於世後復有佛  
名俱那含牟尼出現於世後復有佛名曰迦  
葉出現於世臨二今我釋迦牟尼出現於世大目  
犍連我先發誓願於如是等諸佛以七寶華  
而散供養已然後方成正等正覺大目犍連  
彼一一佛從初發心乃至成等正覺皆是經  
歷無數之劫我從發心至今成佛劫數甚多

不可算計彼色究竟天少知少見汝勿生疑  
爾時世尊說是經已大目犍連疑心即除歡  
喜踊躍禮佛而退

佛說諸佛經

大乘舍黎婆擔摩經

宋西天三藏朝散大夫試鴻臚卿傳法大師施護奉詔譯

如是我聞一時世尊在王舍城鷲峯山中與  
大苾芻衆千二百五十人俱復有菩薩摩訶  
薩衆慈氏菩薩而爲上首爾時世尊觀舍黎

娑擔摩已告諸苾芻言若有苾芻於十二緣生而能見了是名見法見是法已即名見佛世尊作是說已默然而住爾時舍利子尋作是念今我世尊說如是法當云何義云何了知即往詣慈氏菩薩所到已相見各用軟語互相問訊即與慈氏菩薩坐大石下時舍利子白慈氏言今者世尊爲諸苾芻說舍黎娑擔摩經言諸苾芻若於十二緣生而能見者是名見法見是法已即名見佛菩薩我今不解斯義何等名十二緣生云何名法云何名

佛唯願菩薩略爲解說爾時慈氏菩薩告尊者舍利子言如來法王具一切智隨宜所說甚深微妙汝今問我我今略說舍利子如世尊言若有苾芻於十二緣生而能見了是名見法若見是法即名見佛舍利子十二緣生者所謂無明緣行行緣識識緣名色名色緣六入六入緣觸觸緣受受緣愛愛緣取取緣有有緣生生緣老死憂悲苦惱如是生者即一大苦蘊生舍利子彼無明滅即行滅行滅即識滅識滅即名色滅名色滅即六入滅六

入滅即觸滅觸滅即受滅受滅即愛滅愛滅即取滅取滅即有滅有滅即生滅生滅即老死憂悲苦惱滅如是滅即一大苦蘊滅舍利子世尊如是說爲十二緣生舍利子言云何名法菩薩告言聖八正道名之爲法所謂正見正思惟正語正業正命正勤正念正定舍利子是八正道果報涅槃是故世尊略說名法舍利子言云何名佛菩薩告言若知一切法名之爲佛如是得聖慧眼見菩提分法乃證法身復次云何見十二緣如佛所說若人

恒見此十二緣無生無滅無作無爲無取無著如實不顛倒寂靜無怖大聖無盡止息悉皆無性若如是見是人見法若能如是恒見無生無滅無作無爲無取無著如實不顛倒寂靜無怖大聖無盡止息見法無性彼人是見無上法身佛是得正法正智止息三昧復次舍利子白言以何故名爲十二緣菩薩告言以有因有緣名十二緣舍利子是法亦非因非緣亦非不因緣又從緣有子今略說其相如來出生及不出生是因緣法常住平等

如實非虛是真實法離顛倒故又舍利子如是緣生分爲二義何等爲二一者從因二者從緣此二種義分爲內外外緣從因所生者謂從種生芽從芽生苗從苗生莖從莖生枝葉從枝葉生華果若無種子即不生苗乃至華果亦無所有若有種子即生苗莖乃至華果無不有故舍利子彼種子不作念我能生芽芽亦不作念我能生苗莖如是乃至華亦不作念我能生果果亦不作念我能從華生如是外緣從因生法可見又舍利子外因從

緣生者謂緣六界合集故云何六界所謂地界水界火界風界虛空界時界彼地界能安立水界能滋潤火界能溫煖風界能動搖空界能無礙時界能成就如是六界各各緣合種子得生芽苗華實無不具足如是六界一不合者種即不生乃至華實亦不可得然彼六界各無有我彼地不言我能安立水亦不言我能滋潤火亦不言我能溫煖風亦不言我能動搖空亦不言我能無礙時亦不言我能成就然彼種子不言我能生芽芽亦不言

我從諸緣得生彼芽等所生非自作非他作亦非自他合有非自在天所化亦非時化亦非緣生亦不一事生亦非不因生然彼地水火風虛空時分及種子華實而彼從生不即不離無盡滅故此外緣生復有五義何者爲五謂不常不斷雖滅不盡少因多果互爲所緣云何不常謂種子與芽名別異故云何不斷謂從種有芽芽生枝葉故云何雖滅不盡雖滅者謂種壞似滅不盡者謂傳種生芽云何少因多果謂一子爲因果實繁倍云何互

爲所緣謂因種有芽乃至華實相似連環復爲種子故復次云何內十二緣此十二緣復有二義云何爲二謂一從因二從緣云何從因所爲因於無明乃生於行乃至生老死憂悲苦惱若無無明行亦不立乃至無老死憂悲苦惱而彼無明不作念我能生行行亦不作念我從無明生乃至生亦不作念我能生老死憂悲苦惱老死等亦不作念我從生生是謂從因所生之相云何從緣所生所謂緣於六界得和合故何等爲六謂地水火風空

識此六界合時是名從緣生故云何名地界  
謂身堅實此名地界若身滋潤此名水界若  
身溫煖此名火界若出入息此名風界若身  
無障礙此名空界眼識乃至第八識此名識  
界如是等六界緣和合故乃生其身然彼地  
界不作念我能堅實水界亦不作念我能滋  
潤火界亦不作念我能溫煖風界亦不作念  
我能出入息空界亦不作念我能無障礙識  
亦不作念我能成就身亦不作念我從衆緣  
生然非衆緣身亦不立而彼地界無我無人

無衆生無壽命非男非女亦無自無他乃至  
水火風空識界亦無我無人無衆生無壽命  
非男非女亦無自無他又復若於如是六界  
而作一想凡夫想常想實想久想樂想我想  
人想衆生想壽命想蠕動想由無智故作如  
是等種種之想是故說名無明由無明故即  
生貪欲瞋恚無明緣行行亦如是著於假名  
生諸妄想名識識生名色名色生六入六入  
生觸觸故生受受故生愛愛故生取取故生  
有以有故能生後蘊名生生已衰變爲老蘊

敗壞故爲死以愚癡故即發生憂悲苦惱又以衆苦集聚逼切身心處大黑暗名爲無明造作爲行分別爲識安立相爲名色六根門爲六入對塵名觸得苦樂名受飢渴名愛追求名取復生業爲有後蘊生爲生蘊熟爲老彼壞爲死思懼爲憂慘切爲悲衆苦爲苦勞十二擾爲惱又復翻真實爲虛妄以邪見爲正見以是無智故名無明行有三種謂福行非福行無相行作福行得福行智作非福行得非福行智作無相行得無相行智如是乃至老

死憂悲苦惱此十二緣各各有因有果非常非斷非有爲不離有爲非心法非盡法非滅法本來自有所生不斷譬如江河流注無絕爾時慈氏菩薩復告舍利子言彼十二緣復以四緣增長所謂無明愛業識等彼識種子以自性爲因以業爲地以無明愛煩惱覆蓋識種發生彼業與識爲地愛與識爲滋潤無明覆蓋識得成就彼業不作念我能與識種子爲地愛亦不作念我能與識種子爲滋潤無明亦不作念我能與識種子爲覆蓋以是

緣故識種成就識亦不作念我從衆緣生復次業爲識地愛爲滋潤無明覆蓋種子乃生處母胎中爲名色芽彼名色芽非自生非他生非自他合生亦非自在天生亦非時化生亦不從本所生亦非無因緣生是法實從父母衆緣和合得生然彼名色芽本無主亦無取捨自性因緣如虛空幻化復次眼識所生有五種因緣何者爲五謂眼色明照虛空意念以此五緣而生眼識以眼爲所住以色爲所著以明得觀照以虛空得無礙是故意念

起諸爲作以是緣故眼識得生若眼色明照虛空意念等緣不和合眼識不生然眼不作念我能爲眼識所住色亦不作念我能令識之所著明亦不作念我能令識得觀照空亦不作念我能令識無障礙意亦不作念我能令識起爲作識亦不作念我能從衆緣生然眼識實從衆緣和合而生如是諸根次第所生皆亦如是復次無有法從今世至後世但以業果因緣妄想所生又如明鏡照面面現鏡中實無面入鏡內由妄想因緣而顯現故

又如滿月高處虛空去地四萬二千由旬影  
現衆水非月沒彼而生此水亦由妄想因緣  
故現又如取火得薪即然薪盡即滅復次舍  
利子無有衆生從此世至後世亦非後世至  
此世但以業結成識種子處處得生託母胎  
藏生名色芽此因緣法本來無主無我無取  
無捨如虛空如幻化無有實法而善惡之業  
報應不亡又十二緣復以五事說何等爲五  
謂無常不斷無減少因多果相似云何無常  
謂此蘊滅彼蘊生滅即非生生即非滅生滅

異故故名無常云何不斷謂如秤高下此滅  
彼生故云不斷云何不滅謂衆生界所作因  
業皆不滅故云何少因多果謂凡所造因亦  
如事田專心勤力故獲果廣多云何相似謂  
所造因業不獲異報故云相似復次舍利子  
如佛所說若有能觀十二因緣者名爲正觀  
正智慧云何正觀正智慧謂觀過去未來現  
在三世所生不作有無之想來無所從去無  
所至若沙門婆羅門及世間人能觀是法不  
生不滅無作無爲無取無捨不顛倒寂靜止

臨二

十五

息無性若能如是見法寂靜了知無病無瘡  
如喘息間我見即除如斷多羅樹頭不復更  
生是得不生滅法舍利子是入獲法忍具足  
如來應供正等正覺明行足善逝世間解無  
上士調御丈夫天人師佛世尊當為授阿耨  
多羅三藐三菩提記爾時慈氏菩薩說是法  
已尊者舍利子及天人阿脩羅乾闥婆等歡  
喜信受頂禮而退

大乘舍黎婆擔摩經

佛說大金剛香陀羅尼經

宋西天三藏朝散大夫試鴻臚卿傳法大師楚護奉詔譯

爾時世尊說此大明能降伏諸天宿曜此金  
剛香大力最勝如金剛寶有大利用能破諸  
山若有最上星曜而不降伏但念此金剛香  
真言天等星曜驚怖戰悚而自降伏如風吹  
樹枝隨風低仆即說陀羅尼曰

曩謨引羅怛曩合二怛囉合二夜引野曩莫室戰  
合二拏嚩日囉合二播引拏曳摩賀引藥乞叉合二  
細引曩引鉢多曳引唵引曩謨引婆誡嚩帝